



序

山水文章古人譬諸眷屬我輩
於此興復不淺况於奉

九重之嘉命陟萬里之脩途星軺
初巾食指欲動者乎吾讀澹餘
先生南行紀穆然移我情也不

月
伎幼而好遊每嗜前人遊記彙
置枕函如雅琴當前衆山皆響
披吟來夢不殊伏軾執綏從之
載馳矣然而永叔石湖諸紀稍
叙旅懷殊少風物烟雲旣儉諷
咏無聞至若子美僑居蜀楚殆

遍可謂詩中有畫矣第其以窮
愁老病之身萍跡無歡酸辛盃
炙霜天猿嘯半是商音展卷未
終愴然三嘆以語壯遊固未當
也近惟泚亭孫相國南行紀畧
取裁道元以事爲經而詩緯之

雖篇章亦止十一然而結體芳
韶無非風人之致但不盡五七
爲句耳此固獨有千古難與爭
鋒也私念他日遠遊當倣惠之
改塑法以詩爲經以事爲緯詳
註其下或可分道揚鑣異曲同

工乎乃予一棊三湘竟無隻字
惚恍自訝竟爾食言心且惑之
迨入都解驂得先生一編乃莞
爾笑曰是矣是矣爲不佞解嘲
者賴有此耳昔棊淨能攝神書
碑今古詫爲怪事此猶術士戲

劇也先生則以馬僕精靈招呼
屈宋於壇坫下夫左徒師弟子
之魂幾向楚些聲中散盡矣蓋
幾百年而乃復魄獻琛有此一
日也江山絡繹奔會空濛七澤
三湘遂無遺照咄咄恠事哉先

生向者建節西楚德威揚奕已
奪羊杜之蝥弧茲以迢遞星槎
又抽屈宋之篔簹如此不亦泰乎
或獻疑曰屈宋魂冥漠江山思
寂寥馬戴何以云爾也夫馬戴
之詩則亦言馬戴之屈宋江山

可耳豈知千秋文士譬如多寶
分身而五岳名區亦屬文人湯
沐河陽之旌旗非有殊也而臨
淮一入則有殊觀矣春秋之法
能左右之曰以豈不視乎其人
哉或又以騷詩異體爲疑此亦

拘墟之見也夫文章體撰通變
何常譬如歌哭總入宮商龍鳥
更爲篆籀不過一音一筆狡猾
姿殊耳前人謂盧次梗之擬騷
仍卽其所論者而韻之耳此似
深求然亦篤論也彼蒲荷菡萏

可入騷經薛荔女蘿亦云詞料
圓折方流遇物成形何定之有
推而言之飛龍割羊易亦可參
弦管宥密思成詩亦可列典謨
吾安知三百篇之不出一手六
經之非一書乎但分途則吳楚

殊疆滙流則江淮胥海故或則
分陝周召或則改幟趙漢假令
屈宋降靈生於今日俯爲近體
正應爾爾亦何疑於逕庭乎所
妬者先生先我着鞭幾於竭澤
之漁遂使繼此于役湘衡者搖

筆久之宛如張奭卽欲夜郎奮
臂槌碎黃鶴樓其可得乎此則
不能不有憾於先生而無如之
何者也雖然東門之役豈其其
心無已則有一焉閉戶垂帷焚
香就枕一編靜對屈指疆途某
溼其峰風景如對旅人懷抱岸
畧不殊則楮墨有無同異亦化
矣一一鶴聲孰爲王氏青氈也
文通之毫其或借去許田之璧
不妨假來楚弓蕉鹿倘爲虞芮
之質也者臯陶雖聰安得不聽

熒乎且不止不佞一人作趙陀
自娛已也先生自此將拾級鼎
衡不復廣輪命駕嗣後有事於
楚者吾知山川亦如耆舊久已
龍鍾無復新裁供娛鞞使各手
此編以往竟作家珍何止帳秘
不妨軒軒而舞颺言於衆曰此
湘楚之宿冊亦星韜之公什也
濫觴有階則自渤海之得弓分
鹿始矣先生雖復有憾於不佞
乎又將如不佞何哉唐突苧蘿
自昔有徵彷彿皇甫則吾豈敢

年家眷弟高珩題

南行日記

北海曹中吉澹餘甫撰

康熙六年丁未八月予奉

命祭南嶽十七日

延遣受香帛祝辭以出治裝四日于二十二日就道

留別諸同學一律握手臨風攬敝裘塞雲遙接

楚天秋半生婚嫁慙禽尚萬里山川入壯遊客

興自隨鷗共語去程好與雁同謀帝城知己勞

相念目極瀟湘獨泛舟由廣寧門西向羣峯當

面涼風襲人從塵鞅中來如鳥附翮午過盧溝
折而西南向一望坡陀漫衍渾河南注人馬行
平沙中亂石觸足輿夫彳亍不定西風轉厲飛
塵滿輿牛車縱橫道上咄嗟逼人居然塞垣間
意是時情緒殊惡夕次良鄉縣宿焉二十三日
抵涿州是日飛埃結霧行騎如雲七十里景況
畧同惟弘恩寺側茂樹成列秋深露重曉色掩
靄蔚然可觀而已二十四日次定興二十五日
次安肅百里內道途坦廣土塬夾峙行者舉目

無所見間有餘瀝水平川純出塬外平原蒼莽
杳然無際定興雉堞不完土垣不頽者數板安
肅亦土垣耳而稍完整一郭之外皆旂屯牧
地民生蕭寂而兩邑令長多以善緝逃得優擢
仕宦有捷徑非虛語也是日以長途善倦望衡
湘猶在天末輿中成一絕日向天南逐使星荒
烟踈柳短長亭幾時秋盡湘江岫坐對君山一
點青二十六日晨出安肅逶迤而南柳陰夾道
寒翠未凋零露欲滴時有一二紅樹點綴道左

西望遠峯聯絡爲朝光所映數十里蒼翠可接
午抵保定保定古上谷地規模雄濶畧似吾郡
城中士大夫鱗次而居門楔相望令人有鄉國
之思焉二十七日早起偶成一律城邊清漏絕
窻際曙星微燈細孤烟動庭空萬籟歸起聞松
露滴坐愛竹禽飛行矣秋風裏那能憶釣磯日
初升出西門南向霜華被野朝曦蒼然已刻抵
陘陽驛一飯而過數里爲方順橋考之記云曲
逆水至此始順流故名再數里見紅樹甚多淺
深繡雜與黃碧相錯天然鋪繪極盡晚秋之美
輿行其間暫忘疲繭是日行九十里至慶都邑
內蕭條僅同村落堯母陵在城內去公署不數
武甫入館得艾長人先生畱贈之什予酬以四
韵驅傳天涯客分攜內殿香後塵常得逐前旆
尚相望嵩嶺笙兼鶴湘濱月帶霜偕歸應計日
酌酒話奚囊二十八日慶都道中再賦寄長人
先生兼懷冰壺先生九疑迢遞四千里三輔馳
驅六七程映水柳條未悵悻經霜柿葉轉分明

浮雲落雁中山國寒日荒丘堯母城咫尺望君
還不見東瞻畫鷁遠含情時冰壺由水路之越
也出慶都見繞郭皆水田秔稻將熟似江以南
景色四野充盈邑宜饒矣而瘠爲諸邑最問之
皆羽林屯牧地耳三十里至定州界長林茂樹
道旁森列地多清流野無曠土爲南來風土之
冠午渡唐河入州城城廖濶似一都會而居人
鮮少煙火闐然延見州守問知雪浪石無恙而
已二十九日自定州午至新樂署中詩板滿壁

徧閱之亦間有琅琅可誦者管白少傅過巫山
盡去諸詩板獨留皇甫冉等四篇與繁生誦畢
同濟竟無篇什良有以也飯畢出城渡沙河而
南河流深湍平沙數里殊敗人意是日行百里
抵伏城驛宿旅舍中九月一日早發道中作吾
行方作客颯然秋已暮侵曉戒前旆微霜覆古
路日出林杪青涼風生遠樹北雁隨我車飄忽
復南去影滅平沙間遙遙不知數雲山西逶迤
千里莽回互淒清謝旅夢躊躇臨埜渡客思懸

南行日記
天末浩如水東注已刺入真定真定古劇郡山
川雄深爲諸郡之最入館東南隅石碑巋然長
人先生告予曰此唐碑也考之乃永泰二年建
蓋千餘年物矣是日悉辭諸召者獨詣梁玉立
先生飯賦呈一律洛下風流鄴下名居然後進
侍深觥百年甲第圖書古一代龍門冠蓋榮黃
菊欲開還命酒青山無恙早歸耕

聖朝闢館思元宰爰立終期信史成時方修

世祖實錄故篇末及之二日由南門出門內石浮圖

壯麗可觀女牆外敗荷瀰望想見芙蓉十里之

勝恨非盛夏來不得披襟以當也南渡滹沱迂

迴二十里始得驛道茂樹叢立西風謾謾然黃

葉半墮入藥城境更勝唐王摩詰云行踏空林

落葉聲不意於行役中見之殊足樂也三日發

藥城行四十里抵趙州趙州古平棘地爲趙故

都問土人以舊蹟多不能舉獨傳橋上僊人跡

而已橋去城五里而近甚非壯觀所謂僊人跡

乃俗人僞作殊不足稱遂驅車竟過輿中成詩

微陰覆水擁城根指點唯餘瓦礫存當日裹錐
容國士後人絲繡愛平原孤丘數尺穉雲影遺
鏃千年野土痕更問高橋僂蹟在荒唐往事不
堪論自橋以南至栢鄉多兩漢以來舊蹟樹楔
于道亦不暇深考行至夕入栢鄉宿焉長人先
生是日亦宿栢鄉前數日皆先予一日發予以
楚程尚遠遂言別期于明日先發不能不黯然
也四日早發栢鄉日甫出已行十餘里越重嶺
至內丘畿輔地多平衍至此稍見高阜嶺端西
望層山複嶂羅列目前遠者滅沒近者赭紫嶺
畔絳樹穠郁黃花點綴聊足當山行矣內丘飯
畢卽行六十里抵順德郡道旁古塚累累相望
莫知誰何管石勒都襄國死作疑塚殆此耶宿
連城書院畱四韵別長人先生前驅翻悵望秋
冷古邢州千里昨宵別孤雲此地愁殷勤憐楚
道先生賜言別
詩憫其遠道拂拭愧吳鈞惟有叢臺月清
光兩處浮五日發邢臺辰至沙河宋廣平墓在
路側顏魯公書未甚剝落兩公遇雖不同而嚴

南行日記
氣正性則一也出城卽渡河南向平沙十餘里
岡巒叢委瀾漫無際其淺處猶足沒蹠輿中成
一律平沙無際接雲根極目翻同古塞垣乍結
長堤埋短碣漫隨流水掩孤村臨風忽訝花成
霰近樹還疑絮有痕寄語征鴻無宿處此中應
憶稻梁恩午至臨洛關飯畢復行五十里抵邯
鄲夾道柳陰黃未勝綠長堤如砥晚照蒼然亦
暮秋之勝黃梁倦蹟去邯鄲二十里而近世所
傳盧生事也唐人多寓言其詞本于漆園後人

輒立祠實其說及臨川傳竒出舉世認以爲真
矣予偶書二絕昔人方悟夢來者復疑真處處
邯鄲境蒙莊別有神遽遽誰獨覺栩栩爾先知
爲報仙翁道黃梁少熟時入邯鄲時已薄暮邑
令梁御鼎予同年友也復得四韵清絕邯鄲道
蕭蕭晚渡河雲分山勢斷風急葉聲多大野秋
烟合空林夕照過紀程千里遠欲問夢如何蓋
自京至此恰千里矣六日霧中發邯鄲十五里
霧始解因成微陰至午復晴是日多傍山行曲

折亂石中西望巖壑重沓已入中州界磁州城
 北十里中敗荷被野水流湛然不復知有緇塵
 事一詩紀之使車重適豫西望愛林間野日臨
 關白途中有秋雲隔嶺踈柳寒青拂听荷老碧
 侵渠景物饒佳興因之憶舊廬七日自磁州行
 二十里渡漳河河廣十里沙壅水淺舟不能達
 輿從人頂上過河色濁而流悍自出都來見水
 之濁者桑乾滹沱與此而三矣成一律濁水西
 來渡屢移遙分岡勢影參差九秋木落空山出

十里沙深小艇遲城畔風雲留晚照

道側有講武城舊址

臺邊鳥雀動寒颼

銅雀臺亦在河畔

蒼然古道無窮思

鄴守千年定有祠

謂西門豹也

至彰德署中小亭顏

曰天琴鼓掌扣壁有聲鏗然真天籟也亭中顯

咏多佳予亦繼作一首昔人論琴理難於指上

聽淵明好無絃言下聲泠泠誰知天地音悠然

會此亭鼓掌清籟集抵壁亦鏗鳴人去聲俱寂

彷彿眾樂停起看秋月白迴眺秋樹青浩浩有

奇趣因之暢性靈初八日自彰德行四十五里

爲湯陰邑北十里乃羨里地署中拳石玲瓏古
栢數株有幽致可挹南郭外樹一木楔顏曰柳
廊柳影扶疎分列十里道側古碑穹然爲晉侍
中嵇紹血濺帝衣處旁有祠甚修整然不及城
內岳鄂王祠廟貌巍煥爲一邑之最也扁鵲墓
亦在路旁考之記云鵲爲民行者所忌刺之而
斃古稱神術者如鵲及郭璞之流皆不得其死
抑一藝之精亦爲天所妒耶是日宿宜溝驛去
湯陰二十五里中夜有作古驪空明漏欲分虛

窻蘿月白紛紛夢依馬跡臨淇水心逐鴻聲入
楚雲秋老柳條和露脆夜涼松子墮階聞朝來
應負登高約可有黃花對夕曛九日發宜溝三
十里涉淇水河流齒齒霜清石瘦西眺峯巒疊
峙如在目前又三十里至淇縣縣境田多不治
荆榛滿眼前六七年過之凋敝殊甚常有三四
邑令皆以不滿歲報罷罷復不得歸困苦萬態
邑爲之蕭條今見其城垣廬舍公廡祠宇皆修
飭可觀四野雖蒼涼如舊而稍通烟火地之興

南行日記
九
廢豈不以人哉飯畢復行五十里至衛輝府北
于墓距城北十里石碑立道左傳爲孔聖手書
是日道中有懷艾長人先生茱萸已任酒杯空
令節關心野菊叢作客難期稽呂駕逢人欲問
卽鄘風棲遲白雁浮雲外斷續青山夕照中矯
首蘇門長嘯侶登臨無計與君同蓋長人先生
將由衛輝西行而予南向也入署黃菊二本清
致楚楚可以酬佳節矣十日發衛輝抵延津七
十里石田荒阜沙白草黃幾同塞上十一日早

出延津行十餘里方曉日甫出地光彩未定赤
莫可名狀漸升卽漸作金色曠野觀之最爲奇
絕行六十里渡黃河時秋暮水猶泛漲前驅初
至風浪如屋怒濤可駭予陳牲醴畢泛舟而過
風爲之息賦一絕長河勢遠接天平岸柳扶踈
解送迎安穩中流帆一片舟人指點汴州城時
于岸邊忽見高遜業自鄉中來邀之同濟問其
所向云將遊楚中訪道予甚嘉其意卽舟中賦
三詩贈之蓋紀異也海上淪漣舊水聲真傳豈

是世間情黃河九月濤如此君欲尋仙何處行
勇猛辭家遠學僂囊空萬里不持錢相携名嶽
真吾事秋盡逢君河水邊憐君瀟洒大河濱談
笑中流意氣新漫羨僂舟同李郭何如采石錦
袍人賦畢行三十里抵開封開封予舊遊地昔
歲在庚子此中猶無城郭諸當事皆寄居杞今
居然雄麗成一都會矣十二日午發開封夕抵
陳留陳留城小而地狹似非漢陳留故治而志
亦不詳丁令恭予同郡日照人憶予八歲時避

兵海上曾宿其家時萊公齒方十三泊長同爲
諸生予與萊公相繼登南宮家兄偕其季弟舉
癸卯鄉闈乃仲希仁復成丁未進士尊君給諫
先生尚無恙金友玉昆爲吾郡之盛事茲相見
握手道二十五年舊事如昨日耳賦一律贈之
亂離悲昔日童稚識交情盛代同霄漢難聲各
弟兄經秋隨雁影問俗聽琴鳴碩望黃門舊傳
家政已成十三日至杞縣地沃民繁甲于諸邑
自渡黃河來天氣和燠綠樹蓊鬱木綿徧野殊

少霜意予自畿北來至保定時已見霜今二十
日矣相去千里而氣候懸殊乃爾十四日自杞
縣至太康村落相望林光遙接盡日行殊不寂
寞道傍多柿樹紅葉半脫朱實纍纍何減橘柚
是日晚行道中有作數騎穿林樾高低間夕陽
斜風驅鳥雀細徑出牛羊間俗豐年樂停車野
興長竚看新月上人影晚蒼蒼又懷古一首懷
古能令客思傷荒城南望正茫茫衣冠六代推
湯夏游豫千年戒太康大野驚雲孤雁沒窮秋
落日半林黃奚囊猶是當時舊好伴方筇入楚
鄉十五日抵陳州已亥歲杪予由楚叅藩移睢
陳備兵使者三閱月而內遷今啣命之楚復路
出宛丘昊陵北峙湖水四遶風景不殊而遙遙
七載感賦二律七載并州舊乘輅此再來柳湖
前輩蹟蒼草古皇臺尚憶登臨咏終慙卧治才
浮生真過客覽眺幾徘徊父老遮車拜仍褰舊
日帷請纓成往事典禮幸清時月白淮陽閣山
遙峴首碑機緣良不偶兩處采風詩又戲作一

絕五月棲遲憐宛水半生踪跡類浮雲寄聲騎
竹兒童道會否當年識使君十六日發陳州大
霧迷漫數尺之內茫不可辨巳刻始解因成一
律四野陰垂霧濛濛晝不開沾林成碎雨籠水
類輕埃雁度紛難識鴉飛濕乍迴祗疑秋色裏
深入白雲隈行五十里渡潁水水不甚廣而窈
然以深小舟輻輳可通南北一勝處也又二十
里宿商水十七日自商水抵上蔡計程九十里
僻徑曲折幾絕人踪野水縱橫荒林歷落行役

中蒼涼欲絕中道微雨徘徊問渡危橋曲磻不
知路之奚從比雨止入上蔡日已曛黑陳蔡之
間誠難爲懷道上有言虎事者云虎數五去道
十里而近晝多伏匿不動村人相聚探其迹攜
鉦鼓刃而往至近虎忽出草間搏二人一斃一
創甚此前日事也因作伏虎行記之陳州已過
蔡州始野徑蒼涼日百里深莽危橋不可行有
人抵掌談虎事虎窟潛營官道邊紀數維五聲
哮然雄姿晝匿林光黑夜夜晴從林外懸村民

南行日記
結束俄成陣虎穴須探況在近壯夫手搏今吾
徒畫虎寧如生虎駿乘興驩呼勇怯同林間蕭
瑟聞腥風鉅不及鳴矢未注虎伏忽躍叢薄中
老拳兩中爪鋒惡一夫長別一夫卧虎勇人怯
今始知事皆目擊日猶昨是時秋晚雨泠泠道
旁說虎亦可聽草長樹短疑蠢動遙指空林色
杳冥虎來虎來胡爲者不伏深山伏平野中原
淒索爾爲羣何用相隨渡河也十八日由上蔡
早發時雨後半晴北風夜起乍有寒意起际霜
痕在屋矣賦云昨朝微雨孤城黑半夜霜風吹
草白薊北天中一月程遠役轉憐時序迫斷雲
野日少輝光洞庭南望千里隔行矣天涯雨雪
時扁舟更泛三湘色行七十里入汝寧城北三
里許大碑屹立書天中山三字顏魯公筆也然
地皆平行無山卽以道旁小埕當之汝南舊多
名士漢末尤盛今唯有衰草寒煙耳十九日發
汝陽而西荒草無際亘九十里間有頽垣茆屋
居者三兩家而虎跡杳至烟火蕭然是日面山

而行轉近轉蒼秀亂山環抱確山城其中荒寂
之狀爲諸郡邑最成二詩紀之兼贈吳令君璵
何意荒榛裏孤城背亂峯寒聲浮遠水夕景下
高春樹老通狽穴雲深響鹿踪祇愁明日路石
徑曉霜濃小邑嗟難問輪蹄去住頻峯隨殘堞
轉樹傲晚霜新野犬驚人跡空堂訝虎隣朗陵
遺勝在瀟灑寄風塵二十日發確山先一夕邑
尉來告曰勿早發前途多虎暴日高方可戒裝
是日行皆緣山傍礪勢頗崎嶇道中有作羣止

中斷處石逕豁然開萬壑沈秋霧千村剩劫灰
廟荒圍薜荔碑古蝕莓苔心折危溪水泠泠去
復迴九十里宿明港驛二十一日曉行四十里
爲長臺關飯畢渡淮河水清淺不成巨浸流至
江南境合衆流始大耳遙望峯巒層疊莫可紀
極因成一絕清流如帶午潺潺秋盡長淮第一
關莫訝山深無去徑南行更隔萬重山淮以南
崇岬深谷隘不容車羊腸峻絕五十里畧無平
壤古稱冥阨塞爲天下要害良非虛語巖谷間

南行詩
松翠楓丹菊黃茅白繡錯道旁目不暇接亦極
山行之致夕抵信陽州是日立冬二十二日發
信陽有感霜裏驅車日日程偶來曲折看山行
何宗夙擅天中秀謂仲澗水頻經亂後清嘿也隔岫
煙霞遙辨影傍岩草木不知名孤城尚有無窮
恨六代蕭條舊戰聲信陽以南高峯插天千重
萬疊人從谷中行一徑盤折竹樹蒼蒼岩谷皆
滿野花點綴鳥語縱橫最爲幽絕不知有塵土
事書三絕紀事烏道盤空萬壑迷丹楓翠篠近

人低樹深不礙峯峯秀數畝閒雲是稻畦濃澹
天十山光四望除谷中茆屋半欹斜鳥聲却似春深
好開盡溪頭野菊花行七十里次恨這關卽平
靖關也賦一律拾級攀危磴涼生夕氣佳山深
遙入楚水細曲通淮挂樹猿貪果尋泉鹿引儕
雨來關一線恨這是天涯是日竟野宿茆屋一
椽在亂山中四無鄰居亦乏供頓時已入楚界
述懷十七韵一麾昔出走受命楚西陲請纓辭
弱翰仗節登危陴回首戎馬場心折漢江湄泊

南行日記
茲踐華省幸際昇平時顧乏文章用謬承禮樂
司執帛告名嶽將陳壁與珪楚鄉山水綠豁此
平生思耳目悅靈曠筆墨玩清奇雲夢風蕭條
黃鶴影參差洞庭四望濶鸚鵡千年悲椒漿屈
賈廟寒日岫嶺碑鼓棹泝三湘憑杖眺九疑告
虔禮云畢蠟屐志方馳容與泛輕鷁閱歷同採
詩庶揚

天子庭陳彼疾苦詞圖壁追雅尚卧遊聊可師誓還
理征駕永與禽向期二十三日雨中早發卽事

一律濛濛終夜雨雲在半山中宿處煙霞靜行
來竹石通流懸千仞碧樹老一巖紅樵牧聲俱
寂應逢採藥翁行七十里抵應山縣二十四日
由應山南向傍嶺而行徑出峯頂卽盤旋上下
亂石崎嶇勢甚艱脆如是九十里達德安府自
確山而南至德安四百里皆山行淮南山多雜
樹不露山骨道旁田皆廢不耕豐草長林居然
虎宅應山之南山骨皆石唯生松柏間有楓葉
致亦歷落山畔方塘曲塍野無棄土于時晚稻

南行日記
方獲豆田始熟草木皆未黃落天氣似仲秋上
浣二十五日早發德安成一律城畔曉霞紅山
川指顧中霜遲却子國雲薄楚王宮北控羣峰
盡南聯大澤通勝遊殊未已次第攬雄風行六
十里至雲夢又四十里至孝感雲夢城小如斗
而人亦輻輳孝感城外小河可達漢江衣冠鱗
次爲湖北之勝二十六日行百二十里至黃陂
長途迂曲日暮始至值邑令他出入館閭若無
人二十七日發黃陂道中有作河流曲折客懷

同晚出西陵雲氣中江漢忽來天際合瀟湘一
望楚原空青懸橘柚千村雨綠剩蒹葭兩岬風
極目涼生帆外遠磯邊黃鵠影濛濛行四十里
飯蛇口畢泛小舟泝河十里入江口復登陸
風急雨淒江聲澎湃成口號二絕句客裏孤帆
穩江邊小港通便同簑笠叟風雨亂流中艇載
江湖興濤增風雨聲峯頭遙可數杳杳武昌城
復行三十里抵漢口風浪如山舟不可渡遂止
旅舍大風雨竟夜不絕二十八日早起登小閣

南行日記
隔江望黃鶴樓有懷水國行多雨竭來值秋暮
北風號晝夜踟躕漢口渡登臨愁白浪冥冥勞
四顧隔岫眇危樓朱甍若烟霧古來躑名勝才
盡崔顥句佳什至今傳仙人渺何處極眺但蒼
蒼雲遮漢陽樹黃鶴爾飛來予欲凌江去二十
九日曉起舟子來報風止遂命舟急渡時餘波
未平北風甚便頃刻而濟入武昌城三十日以
換舟留江夏不發十月一日過江入漢陽報謁
微風不興江平如綺東眺黃鶴西望晴川江山
之美歸于一攬江邊見黃菊叢茂偶成一律物
候江邊異東籬蕊正香花寒今十月波靜古三
湘常對帆前雨偏遲影外霜飡英千載賦獨詠
意彷徨二日登舟時已薄暮留別丘曙戒別駕
一律晴江極望遠波平夕照頻催鷁首輕雲際
青山湘女廟天邊黃鶴楚王城鴻聲暮入千峯
碧漁火涼生一帶明欲問洞庭水深淺何如十
載故人情三日舟發江夏風自南來行十餘里
卽泊四日五鼓霧中發舟予眠未起比起見波

上烟霧乍浮乍解江豚羣立漁網不絕卽景成
一律鳴榔衝荻浦伐鼓出沙洲日澹雲仍閣波
平霧半收鷗浮狎片槩豚拜響中流隔岸烟沉
裏漁歌畧唱酬夕宿金口驛舟中有詩中流爭
峽過清絕楚南天纜急知峯轉帆低覺浪懸亂
層千尺岸午爨一江烟更問荒村宿衡陽何處
邊五日北風大作波濤湧立舟行甚駛近午勢
稍平晚風復利波光微縐天水相含夕照未收
初月乍上亦一奇也晚泊上簞三家村落耳賦

云風逐孤蓬轉涼生返照中縠紋雲似水弦影
月疑弓野樹臨江綠漁燈隔岸紅蕭蕭蘆荻響
應有北來鴻六日早發岸深湍急頗費推挽之
力枕上作詩紀之盤渦勞百丈力共一灘爭曲
折唯看日風波莫計程漁層隨岸勢石齒動江
聲枕上驚濤慣鄉思夢後生是日泊嘉魚北岸
夜卽微雨七日早晴舟行復雨南岸小山歷亂
雲氣蒙鬱米友仁畫圖也雨竟日不息晚泊竹
林灣入夜風起水湧雨益急濤聲拍岸舟勢搖

搖不定日難交睫因成兩律風雨荒江大浮踪
入夜微悔深勞內訟險逼貴忘機白浪危檣轉
青山遠夢歸自憐寒漏永空羨斷鴻飛波濤心
屢折繫纜大江濱行止關鷗鳥安危託榜人亂
山連夜雨孤棹異鄉身檢點浮生事唯堪釣叟
親入日北風甚便鼓帆直進過午風益厲高浪
拍天夕次臨湘不得泊而過夜宿白螺磯狂飈
竟夕舟勢如簸夜半復聞雨聲客愁欲絕是夕
賦兩律棹入蒼冥一道開長流滾滾易興哀帆
前忽擁千山雪耳畔常驚六月雷絕壁下臨蛟
窟室狂瀾深賴鬼神才舟人笑語渾閒事壯志
乘風已作灰盡日中流與浪爭危磯怒拍兩崖
平一帆月黑天無際萬里風搖地有聲烟裏偶
浮孤磬動寒來翻入敝裘輕那堪更聽蕭蕭雨
此夕能催白髮生九日風浪中發舟頃刻已達
巴陵問岳陽樓遺蹟久已成燼南眺君山中峙
湖波浩渺驚颺乍息夕照入舟江山勝槩在昔
稱雄今郡之荒陋於楚爲最憑弔之頃令人慨

然夜宿巴陵城下有詩巴丘遺戍在孤棹宿雪
端遠界千盤碧平收萬派寬帆脚殘照小月上
夕波寒明發君山側中流指點看十日十一日
南風微發湖不可渡舟留巴陵三日夜分不能
成寐十二日侵曉占七絕四首巴陵城下曙鷄
啼北雁聲多影尚迷咫尺君山不可到濛濛江
月近人低平湖極望北風收估客南來葉葉舟
但使布帆皆穩渡何妨十日坐灘頭洞庭昨日
曉霜濃木落湘山第幾重聞道方筇堪作杖相

扶直上祝融峯偶向瀟湘聽斷猿斑斑千載泣
龍孫楚南近日蒼生泪不是當年帝子痕時岳
州從事連君應鄭巴陵令李君爝皆予同郡素
識十三日邀作君山遊遂泛小舟往午抵山下
山形外凸中凹竹樹叢蔚峯不甚高而無處不
秀舟側卽湘君墓祠宇已頽崇勝寺猶存佛閣
三重居然雄壯其山門舊榜曰有緣山今止存
此榜耳飯過山僧引觀柳毅井水碧湛然傳書
亭久已圯落從寺右攀林穿竹二里許登軒轅

臺峯頂石鏤帝子高山四字畫僅可辨又左折
里許登酒香亭舊跡洞庭千里近在足下夕氣
微茫浩乎無際雨數點從篠中落湖風微動疑
身之在雲中也自峯頂盤旋下時值薄暮望朗
吟亭不登而過舟返巴丘已入夜矣歸作紀遊
詩十六韵卽贈連李兩君云楚鄉饒奇勝茲域
信清曠岳陽五日泊山靈如我貺夙遊欣二妙
探奇敦雅尚湖光千里昏浩然元氣壯天水相
迴映雲峯互滉漾小艇類浮鷗了了辨青嶂獨

秀谿中流屹立絕依傍松竹森蒙翳石影驚濤
盪佛閣舊崔嵬堯女墓相向捫岩穿篠徑足眩
勞一杖軒轅臺已荒柳毅井空悵風雨集崇巔
鴻濛騁遠望佳處領其要曲折遺想像夕鳥倦
歸翼鳴磬晚波上返棹沂微颺岍火明漁唱巴
丘夜色蒼孤舟夢惝恍十四日北風大作挂帆
竟進奔濤接雲驚檣逐鳥洞庭之險宇內獨絕
湖中變幻出沒莫可端倪而片帆安穩一瞬百
里甫午卽達湘陰計程二百四十里矣舟中有

詩只訝連峰走中涵萬頃流精靈湘鬼廟風雨
洞庭舟浪急千帆白山遙一點浮悠然元氣合
生事等輕鷗十五日發湘陰有懷一律蕭颯黃
陵廟依依帝子靈渚邊蘋自白湖外草猶青雲
薄紛遙岫烟寒隔短汀當年虛九辨高咏有誰
聽夕抵長沙府西岸嶽麓聳峙城在東岸江流
其中居然險國是夜覺風寒十六日賦懷古一
律十月潭州天氣涼夜來獨臥一船霜山聯五
嶺瀟湘合地界三苗翼軫傍岫巉巖神功懸嶽麓
飄蕭雁影隔衡陽千年賈傅才偏盛卑濕何緣
滯楚鄉是日周中丞晉侯召飲西城樓江山之
勝在几席間晚波未平殘陽將歛最爲佳致賦
一詩卽贈中丞風烟歷落暮江頭客裡登臨共
此樓鴉引寒光翻極浦山脚夕照入孤舟憑觴
忽盡三湘色倚檻平銷萬古愁天外故人還坐
鎮何如元凱在荊州十七日早發長沙青山絡
繹夾岍不絕北風輕拂清波微動從榻上觀之
信足樂也成一律日從枕上看山行宛折湘流

南行日記
三十四
一帶清五嶽機緣初蠟屐百年烽火乍銷兵侵
帆雲影垂垂碧夾岸嵐光冉冉明賤買木奴勤
命酒扁舟泛宅是平生午過昭山羣峯疊秀杉
竹被體可與君山伯仲下爲昭潭深不可測比
抵湘潭已秉燭矣十八日發湘潭市廛十里餘
估舟鱗集亞于漢口湘流清淺舟行甚遲晚行
數十里竟成野泊賦一詩小艇波心黑繁星共
一灘岬懸通篠逕鐘細出雲端虎跡荒江大猿
聲永夜寒乘槎真萬里斗北是長安十九日早

發夾岸多薔薇修竹遠峯疊翠令人應接不暇
晚仍野泊二十日行三十里灘淺水落官舫不
可行遂易小舟僅斗大過三門灘有作垂縵中
流澁何季斧鑿痕雲帆驚百折石齒盪三門險
過喧灘子湍迴泣岍嶺羣山如揖客依約領黃
昏晚過昭靈廟賦一詩雲起荒祠側空江半杳
冥我猶悲正則俗自祀昭靈湘澧千秋賦椒蘭
十月馨峰峰殘黛色遙接九疑青泊灌店舖舟
中跼窄臥難帖席夜未半卽乘月發一律紀之

枕畔響潺湲懸流度幾盤月高天乍曙舟窄夜
增寒宇宙浮名小江湖遠道難數聲霜裏鳥侵
曉喚漁竿曉爲二十一起跡寒日半吐宿霧
猶含一氣混茫都不辨物因憶杜詩云日出寒
山外江流宿霧中二語道盡卽景再成一律輕
颿觸浪曉漫漫元氣中流自鬱盤萬里奔湍浮
野日半天高霧捲晴巒鳥聲穿壑烟初動漁網
排空影尚寒嶽頂雲開千古事明朝試拂畫圖
看抵衡山縣境遠望山勢穹窿群峯俯遜知爲

南嶽矣但湘流曲折一向一背正自不能了
二十二日駐衡山縣有作雲際一帆輕湘南兩
月程鷗能隨遠泛鴻亦怯孤征嶽色平侵郭江
流曲抱城夜涼羣籟息寂寞道心生二十三日
出望嶽門西向層嶂遞接踰一重始見一重峯
頂數重後得歷歷辨天柱紫蓋諸峯雄深峭拔
兼有其勝尤難者羣峯聳峙獨讓祝融一頭地
餘皆才堪伯仲各有雄跡一面之槩使在中原
自當與岱華爭霸狎主齊盟豈第爲南服奧區

而已午抵山下入嶽宮奉置香帛畢暫憩勝業
寺晚復入廟眎牲醴歸卽齋宿寺中李道人常
庚自山中來謁詢其貫卽予之同郡其離俗之
年乃天啓甲子叩其所得曰無所失夫無所失
非得乎豎觀其叙次楚楚清姿癯立自是方外
勝流四韵贈之我行名嶽裏期有異人逢果見
烟霞客言從縹緲峯塵緣銷遠林勝業隔踈鐘
四十年來事依依故國容二十四日五更詣嶽
廟修祀事天和月朗微風不驚成禮後賦四章

敬紀縹緲高峯天半看依稀鳥徑接巉岈千盤
迴出當空秀一杖遙知絕頂寒遠道山川歸使
節清宵煙霧隔僊壇白衣舊有栖霞志擬向深
巖問懶殘羽蓋霏霏紫氣翔還同牧伯領南方
山靈笑拂龍鸞影

天語遙生草木香月午參差涼竹樹嵐低蒼翠滿衣
裳畱連福地耽佳興指點虛無望

帝鄉樓閣飄颻赤帝居悠然天籟響空虛湘沅九道
同衣帶泰華千秋自友于神值懷柔紛欲降才

慙封禪定焉如雲中絕壁深難度知有當年玉
簡書包括雄風峙楚宗森森臣庶俯羣峰禹功
文字傳科斗火德天施號祝融絳節千靈扶日
近金泥百代接雲重向平夙約應相誚濟勝才
踈愧短筇予癖耽山水而乏濟勝之具登臨之
頃每爲悵惘茲名嶽當前而未能賈勇策杖予
滋愧矣日初出邑令王君家賢來言九僊觀之
勝遂易小肩輿緣山北向約七八里入谷口巉
岩峭壁夾立千仞懸流飛瀑振盪崖谷危梁深

洞饒有幽邃之致問之知爲水簾洞卽朱陵洞
天也壁上舊鐫甚多大半漫滅不可識予于陡
絕處大書聽泉二字浼工勒之政恐後跡今猶
今跡昔徒增感慨出谷二里許卽九僊觀四圍
環抱一徑幽折嶽秀之氣包涵蘊藉唐宋以來
多爲僊靈發跡之所良非偶然李道人常庚迎
謂予曰昔唐張曲江常訪司馬天師於此詩集
可徵予笑語道人子頗類子微顧予不及曲江
公耳觀中清泉曲引嘉樹列置修竹萬竿掩映

小閣時初冬已杪而此中草木殊無寒意唯楓
葉數片時落岩際點綴間畧似秋色院內盤石
圍十丈許上大鐫九僊飛昇之壇六字勢猶生
動游人多踐其上予告王令當作茆亭覆之圍
以竹檻亦可免風雨剝蝕爲前輩畱此一段公
案耳旁有石如牛臥甚堅整從未經鐫李道人
言此石似待今日予濡毫欲頤十僊福地於上
道人辭弗敢遂書待其人三字并同游姓名及
歲月繫以兩絕句松生石罅任雲遮洞口時開

野菊花步步泉聲畱客聽青青山影上衣斜四
山環處萬竿橫踏徧蒼苔石徑平花裏僊壇來
午磬峯峯啼出畫眉聲題畢覓細徑以歸途中
復成一絕樹拂青冥水浸渠家家多傍竹巖石
嶽光偏送夕陽早圖繪人間總不如比至城日
已暮矣二十五日畱衡山縣易舟二十六日早
發風逆浪湧小舟簸盪遠道言歸一棹初返雖
冒險而行勢不可泊否則當繫纜耳舟中成一
律閒憑歸棹一長歌覽勝當如別去何面面雲

山分向背行行旅雁隔關河壯遊尚覺浮名繫
百感偏增歲暮多家國茫茫俱萬里那堪終日
慎風波是日舟中獨坐回憶入湘東來山水之
外有兩佳事黃柑奇大筍絕清鮮時叅玉版師
對黃柑叟此樂生平不置也戲爲口號日日齋
心叅玉版時時酌酒試黃柑風味他年知最憶
鳥聲山色洞庭南二十七日月出卽行已刻抵
昭靈灘陳牲醴而過遂還官舫復行數十里泊
野次二十八日大霧舟人堅不敢發行甚晚卽

事賦十韵水國夜偏寒江上行多霧我來名山
側步步勞返顧九背還九向曲曲湘流趣舟楫
窮所歷楚泊無定處一氣迷昏且咫尺荒烟聚
蒼鬱天邊岫蒼茫岩際樹鷄犬白雲深猿鳥青
冥住孤帆已百折遠道更千慮灘子慎早發脚
躡愁虎渡日色蕩遙波呶啞凌虛去比夜始達
湘潭二十九日已刻方發途中成一絕句往來
只愛昭山秀石氣峻嶒絕處看松桂蒼蒼潭底
影隔江鵬鶚不知寒連日皆晚行多野泊是夕

復中流繫纜去長沙三十里耳賦云寒烟隨夕
照孤棹去來輕波湧疑星動帆移覺樹行暮雲
聯岫紫野火入江明十月湘南盡非關戀濯纓
十一月初一日入長沙郡初三日北風怒號廬
舍震岌兼之微雨入夜成雪寒氣逼人不少北
土初四日曉起成一律北風渾日夜城畔積波
濤氣挾江聲壯寒增岳麓高雲低催雁急雪重
助猿號歲暮湘州客朝來戀緼袍自是至初六
日重陰不解雨雪蒼然北風阻舟遂成栖泊賦

二絕紀之洞庭南畔是長沙寒日淹留使者槎
欲問當年賈誼宅荒城月黑祗栖鴉旅泊天涯
幾日陰北風吹浪轉蕭森雪花飛過洞庭去愁
對斑斑湘竹林初七日爲長至節五鼓起望
闕行遙賀禮憶昔巳亥歲分藩郎楚會逢長至十
年之中兩在楚疆有感成一律荆楚逢長至
先皇巳亥年龍髯悲幾載使節復依然跡界江湖外
心移日月邊陽廻南紀早青草正芊芊初十日
值賤辰賦一律自鼓南天棹常懷北海萼形容

吾漸長歲月爾何頻寒入江湖小天低雨雪勻
深盃殘燭影聊慰未歸人又長歌一首志感我
生三十有三年落落塵中常作客幼經離亂長
驅馳壯齡已覺時光迫早操弱翰入承明十載
多在長安陌欣來名嶽探竒勝靈輿知是羣仙
宅使車空返綠尚慳大藥仙芝難苟得屈指星
沙十日留茲辰偶值天涯色古稀七袞今將半
惆悵人生不滿百無生未學損朱顏髣髴何由
得終黑不如把酒且長謠嶽麓山青湘水白慨

憐中來不能醉酒半有懷空嘿嘿方丈遙遙瀛
海東吾廬亦在嶗山側安得乘風一棹凌滄溟
舉眼還窺洞庭窄十一日晨出報謁念停舟長
沙忽忽經旬因成雜詩二首湘州遺俗古分野
軫邊星塗壁家家赤開門面面青蕉深三徑暗
魚賤一街腥屈賈風何杳空傷十日停城畔青
無際沾霜草未枯山深畱鴈羽日暖長鷄雛父
老頻經戰官僚半欲逋石尤遲客棹歸思滿江
湖十三日登舟北風勁仍泊城下十四日辰刻

方發行數十里野泊成詩蒼茫月上遠波平燭
影中流一道明水國陰晴饒變態天邊猿鳥動
寒聲山川歷歷迎歸棹竹樹依依辨去程三戶
由來烟火少每憑埜岸倍含情十五日風阻舟
已發復回泊舊處四韵紀事風雨荒江路鳴橈
去復廻奔濤連嘶動野燒隔雲開鳥急寒相向
山空窈自哀客舟遙可妬片片挂帆來時棲泊
無聊僮輩走亂山畔折梅花數枝置瓦餅中冷
葢半開幽姿欲絕爲賦二章曲徑攀蘿一杖登

折來冷葢伴孤藤呼僮欲問探奇路香到山中
第幾層野岸欣逢世外姿因君却悟歲寒時輕
舸載得湖南勝江畔梅花一兩枝十六日風稍
緩曉卽發舟薄暮微雨入夜抵湘陰十七日行
五十里泊野際重陰凜冽垂垂欲雪十八日曉
起風雨昏冥舟不可進悶極成詩洞庭湖畔雨
盡日影冥冥濶浪侵雲際長風挾水靈鴉飛孤
棹黑豚拜亂流腥歲晚重陰逼空傷滯使星十
九日風止舟發辰刻漸得晴霽自發長沙來六

日始見日影時湖水初平沙深岸濶來時巨浸
僅及三分之一晚仍泊湖畔去岳陽猶百里賦
一絕青草白沙渡幾盤北風吹雁晚聲寒扁舟
三日洞庭所始信江湖行路難是夜月色皎潔
湖光澄霽孤舟野宿致最清曠二絕紀事舟影
月明中平沙面面風依然天水合萬里鏡光同
月入寒波霽天含遠所開夜深鷗定後猶有棹
聲來二十日曉行汪洋漸涸俯同一衣帶水望
君山已在岸側問土人云是時水落淖深舟與

俱不可登矣夕過巴陵十五里泊城陵磯由此
西向卽走荆蜀道也二十一日未曉卽乘月解
纜日出後水氣上浮遂成薄霧過道人白螺諸
磯皆覲面失之辰後風利經臨湘陽邏新堤俱
揚帆直過新堤古烏林地爲古來四戰之區懷
古有作巴丘儼形勝羣川爭滙聚粵水暨蜀江
城下合東注輕舟歷峭折波濤雜烟霧夜宿城
陵磯午過鴨欄戍微颺集歸檣浩如騁飛鷺萬
象翳錯陳奔流不暇顧烏林昔阨隘緬想龍戰

處魏武紉遠畧空傳橫槩句乘勝遽成驕雄圖
遂鼎據遺蹟亘千秋治亂紛回互夕陽下野岸
饑鳥啄寒樹撫懷傷今曩敬枕揚帆去又東過
祭風臺一律荒臺遐眺倚晴曛彷彿遺颺江上
聞楚地四維皆百戰隆中一諾便三分當年霸
業空殘壘終古山光起暮雲盛代卽今烽火息
磯邊漁釣自紛紛晚宿嘉魚南野岸行幾二百
里二十二日夜分卽發黎明達嘉魚因成二詩
歸舟貪早發山水共蒼蒼野听平分月漁簑飽

受霜夜寒鷄唱遠江靜櫂聲長入臘孤征客行
唵類楚狂舟涼兼滙永江上北風多燒急人防
虎沙晴霧隱鼉客心懸日月波影動星河每怪
危帆轉當如遠夢何又赤壁歌高高赤壁臨江
涖一戰當年成鼎峙捨攘南北挺多才吳蜀君
臣魏父子阿瞞東下氣何雄鷗張虎踞笑江東
荊州已降昭烈走烏林蟻聚千艤幢橫槩還能
賦明月投鞭擬欲乘長風檄傳會獵虛聲動吳
下翻多嘒嘒翁嘒嘒紛紛那足數國士由來出

儔侶公瑾醇醪美少年臥龍魚水真臣主片言
契合紫髯奮群賢勢足奪風雨一炬俄看漢祚
分英雄割據終黃土何事江濱尚有臺寒樵野
釣日徘徊興衰轉轂同一瞬長流滾滾無時廻
壯畧寧期千載後空留殘壘向人開高陵深谷
俱寂寞祇今憑吊傷竒才夜來獨過空山暝荒
祠月上清波影自汲中流垂短纜呼僮洗研還
烹茗是晚風便日落後猶行四十里泊簞洲北
二十三日風雨竟日入夜轉急二十四日雨不

絕成二詩楚澤饒風雨荒洲二日留魚龍寒改
窟鳥雀濕隨舟浪濶浮天影雲低動客愁計程
憐遠道憑權羨輕鷗野岸茫茫動鄉心脉脉賒
一生多遠客臘月尚天涯陰逼蛟龍盛寒生雨
雪斜祇疑銀漢接無計泛星槎入夜寒甚嚴威
逼人二十五日曉际岸雪盈寸矣賦一律洞庭
北渡氣蕭森野泊閒銷幾日陰飛霰隔江明遠
岸驚飈拂樹墜鳴禽亂雲凍合孤舟影永夜寒
生萬里心安得折梅還蠓屐滄浪漁父許相尋

二十六日曉霽舟發後復陰轉仄風浪中行五
十里宿金口驛南二十七日抵武昌二十八日
雨中有作窮陰迷楚道城內亂山多鳥影低寒
雨雲光澹晚波故園荒薜荔孤棹阻江河安得
晴帆轉吾當趁釣簑自是至十二月初一日陰
雨不解入夜雪作初二日成武目雜詩三首鄂
渚一帆停高城色杳冥臨江茆舍白經雪菜畦
青豹霧連山暗鼉風拂浪腥南天多語鳥日日
雨中聽隔岸晴川影帆檣觸浪奔禹功江漢大

楚俗鬼神尊地濕陰常盛天低日易昏荒洲猶
寂寞詞賦舊銷魂入夜覺寒增山中雪幾層經
旬稀見日絕岸半依冰遠夢堪尋蝶浮生只杖
藤危樓仙蹟在今古記誰登初三日晚登黃鶴
樓應丘曙戒之召于時風雨逼人江山在目天
寒日暝四眺蒼然卽席賦贈亦忘却崔顥題詩
在上頭矣茫茫萬里楚烟收日暮登臨江上樓
帆影高低紛遠浦山光明滅枕寒流雁鴻暗入
浮雲色鸚鵡遙生異代愁天半相携還把酒滄

波回首舊瀛洲初四日滂沱竟日似北方七八
月間初五日大雪深凝數寸數日不化亦南中
僅事也初七日復雨初八日曉風甚厲泊午稍
霽偶登高臺望隔岸大別山有賦望裏青無際
山高影乍晴經旬常杳靄隔岸倍淒清野日浮
江閣寒雲界郡城興來思杖屨極目楚烟平十
七日登舟泊江口中夜一絕武昌城外月如烟
兩岼青山江上船無數客帆乘夜發櫓聲欸乃
破高眠十八日大雨抵暮成雪十九日曉跡盈

尺矣賦一律楚天風雪一孤舟永後寒光映敞
裘萬疊帆檣雲際沒千家烟火畫中收茫茫祗
訝山川合歷歷還疑城郭浮江畔淹留傷歲晚
落鳧飛雁滿滄洲是日雪不止二十日稍晴薄
暮復雪二十二日侵曉舟發積陰未解殘雪滿
岸遙嶂荒林寒江孤棹宛然圖畫中行晚泊雙
柳港入夜微雪二十三日立春舟中有作江上
雪霏霏春隨一棹歸人穿荒篠出鷺破曉烟飛
岼澗雲依槩山遙浪拍磯韶華催老大佳典客

中稀過午雪中抵黃州府賦一律蒼茫天一色
雪岸界中流帆影遙侵樹山光暗入舟風烟寒
赤壁詞賦重黃州三楚經行遍春來倦遠遊二
十四日發黃州二絕紀事連朝雨雪歲將闌枕
畔江聲永夜寒夢裏分明拜家慶渾忘身在古
齊安雪堂瀟灑千秋業赤壁淒清萬里流勝蹟
居然前輩好踈雲遠岫送孤舟午後過道士祇
羣峯秀絕巖雪皆滿松竹蒼蒼爲江濱形勝之
冠一律紀之石影摩空秀高低蠹亂峰臨江干

仞瀑映雪萬株松青盡埋猿穴白多印虎踪忽
聞烟裏響疑是暮天鐘是日風利行百七十里
野泊去蘄州十餘里二十五日曉抵蘄州微雪
不泊而過晚宿蕪溪鎮南岸羣山綿亘東接豫
章界矣憶自武昌登舟雨雪浹旬成一詩羣峰
面面雪中看石氣嶙峋映碧湍十日窮陰分楚
界千層細浪接雲端神鴉舞棹荒祠杳野狄窺
人晚樹寒敢向異鄉爭歲月飽經烽燧舊江干
二十六日行九十里去九江二十里而泊二十

南行日記
三九
七日曉發望匡廬積雪高峙雲表真宇內壯觀
辰刻達九江府稍見霽影成一絕句天邊極目
影冥冥雪滿廬山萬仞屏乍接晴烟分遠浦潯
陽九派一時青六代旌旄重上游當時妙選鎮
江州藍輿漉酒柴桑郭却占東南第一儔午以
風逆不得發遂宿城下二十八日發九江風浪
甚急行三十里卽泊賦得白頭浪裡出湓城一
律湓浦輕舟發石尤未肯降亂波浮遠郭寒雨
漲春江九派風烟國千秋戰伐艘歲闌仍作客

空羨白鷗雙二十九日曉晴舟發已過湖口縣
狂飈大作復回泊北岸是日歲除憶舟行已三
閱月矣賦七韵紀之忽忽經三月舟中似卜居
烟光千里濶景物一年除野日初輝燿寒雲乍
卷舒風迎孤舫慢雪界衆峰踈愁對彭蠡雁飽
掌楚澤魚江湖多遠浪鄉國少來書估客浮家
住飄飄愧不如又江上守歲二律故園尚隔二
千里使節今來四月餘歲晚山川頻阻棹寒生
雨雪久離居輕帆蹴浪鼉鼉立遠堞臨風雁鶩

南行日記
四
踈江水遙遙通海畔憑誰先達豫章書高枕天
涯任歲徂西江波浪接南湖風吹峭壁疑飛動
雪擁廬峰乍有無荒岸烽烟酬節序野醪斟酌
應屠蘇乘流志已馳吳會一氣茫茫大小孤

康熙七年元旦有作誰意荒江滸蕭然度歲華漱
流差免俗泛宅尚無家聒耳隣舟鼓關心野戍
笳終慙廬岳隱空返漢臣槎望裏波濤合春帆
此日晴山猶天外影江是去年聲濁釀酬僮僕
孤舟絕送迎流光渾易擲遠客轉須驚一日二

日皆大風波濤山立是處適當彭蠡之衝水尤
湍悍三日舟始發行九十里抵彭澤城踞亂峯
殘堞蜿蜒殊甚荒僻詢靖節舊治云在馬當山
下去今縣治三十里因賦八韻有懷陶令云古
來賢達人不屑升斗祿先生其猶龍肯隨世局
促種秫信爲美折腰良足辱典到卽拂衣曾否
公田熟無絃尚可鳴有酒自然足白眼義熙年
高枕廬山曲祇今荒江畔彷彿東籬菊千秋管
幼安北海同高躅過彭澤七八里許爲小孤山

片石屹立四圍如削遠望皚皚類積雪逼眎之
皆諸鳥遺斗巉岩中有佛寺一區石隙微茫徑
僅一線絕頂小亭可數尺似未易躋攀也賦一
律屹然自鬱蒼拳石水中央峭逼波濤動寒凌
日月長片雲穿鳥徑餘雪冷僧糧愁絕攀蘿客
茆亭覆上方晚泊磨盤洲爲江南望江縣境至
夜狂飈驟作初四日竟日不止幸舟泊小港中
稍免震動初五日微雨有作江干頻滯棹春入
快長征日日辨風信時時計去程亂豚吹雨出

孤鶴隔雲鳴回憶衡廬色名山眼界清初六日
曉大雪花片如掌過午稍霽晚復大雨就枕之
後江濤聲雨聲岸上擊柝聲與鄰舟絃索聲拉
沓并集展轉通夕侵曉成雪旋下旋融枕上但
聞滴瀝猶謂是雨耳初七日雪止成一律曉起
帆餘雪春來日紀人探潮高浪過乞米小洲貧
物候江邊柳鄉心海上鱗石尤何太切幾夜馬
當鄰予連日泊舟處去馬當山僅十里辰刻舟
發風急浪湧行十五里卽泊花園鎮口初八日

過東流三十里避風維野岸薄暮風定復行三
十里夜宿黃石磯初九日巳刻抵安慶初十日
曉發天晴風利自江夏登舟後從無此適喜賦
四韻月落早潮生乘流下皖城聽鴻疑故友使
馬趨初晴岸草新春色江濤舊戰聲青山同過
客到眼費逢迎午過李陽驛太子磯諸處南眺
九華雪猶在巔遙望如白雲蓊鬱九子峯不甚
可辨晚泊池州東十里江口成二絕句池陽山
色晚冥冥九子峯高峙玉屏簫鼓遠來頻賽社

一江風定佛燈青瀟洒文章杜牧之齊山秋浦
兩相宜無端却憶鷓鴣頭女腸斷吳興出守遲十
一日風逆舟行欹側偶成二詩驚帆蹴雪已連
旬日日江流負早春滿眼風波唯袖手閒情輸
與弄舟人白浪青山相對踈江聲東去少魚書
徑須險路收帆早却望荒洲似弊廬夕泊大通
峽十二日早發比曉達銅陵輕風微拂波平日
霽舟中煦然始覺有春意晚抵荻港驛人家歷
落枕山臨流擅江干之秀爲賦一詩吳楚烟波

一棹通夜眠多傍白鷗叢孤帆曉落銅陵月兩
岸春生荻港風曲曲山光茆屋裏家家樹影夕
陽中千年誰續元暉咏解道澄江練許同十三
日漏下四鼓卽發未刻達蕪湖道中有作野望
茫茫白陽光水上浮鷗鳧春避槳星月夜隨舟
曲抱峰腰轉平涵日脚流蕪陰圖繪裏終藉午
風柔十四日泊蕪湖估舶喧闐人聲聒沸兼以
風逆不得發殊敗人意十五日成上元雜詩三
首客裏頗佳節浮生此上元雲涼帆有影江濶

片無痕人語隨方收燈光拂浪昏東流渾日夜
今古幾詞源月上孤舟滿潮回兩岸平誰將山
水影併入鼓歌聲伏枕貪鄉夢乘槎憶友生鳳
城多舊約聯袂九衢行屈指春風後天涯路幾
盤聽鷺過故國隨鷺到長安皓鳧應同照清光
只自寒那堪今夕月空對酒盃乾十六日發蕪
陰東過梁山兩山夾岸形勢峭絕爲古來屯戍
要區晚抵采石已入夜矣成二詩設險江干戍
金陵重上游天門高並峙

梁山一石壁峭常浮
名天門

浪濺寒雲濕風飄晚磬流遠燈勞指點還似泛
漁舟勝遊疲耳目晚泊罷登臨春入魚龍氣山
通潮汐音蕭森孤棹雨峭拔半江陰高咏畱清
響荒祠自古今十七日風雨大作維舟山畔萬
松號怒與江濤相應聽者增慄雨甚不能衝泥
策杖一攀絕頂窮烟雲之勝亦一歎事抵暮大
雪竟夜不止夜分予驟病覓諸藥不得亟炒鹽
湯飲之比曉再飲木瓜湯方平十八日賦一詩
紀事仍用前荻港韻危磯東注海門通勝日淹
畱雨雪叢永夜濤聲迴地軸滿山松籟響天風
鄉愁未減陽和後藥味偏親旅病中鳥徑茫茫
窺絕頂燃犀無復壯懷同十九日曉起風浪未
平偶成一絕偶見垂楊覆遠亭雪紋猶界亂松
青畫眉依舊眠雕檻鴈鴒偏來浴淺汀午過循
翠螺山趾泛舟登娥眉亭峭壁下臨江流蒼莽
亭中多宋元人題詠一李漑之書字格類懷素
從寺僧榻得一紙岩下深洞俯眎無際小徑岬
絕仄不容足同游者多賈勇下觀意甚危之旋

南行日記
四三
至太白樓揖太白像曰徧閱壁間題詠樓踞山
臨江極登眺之美一時守土諸公鐫題殆滿就
樓中少憇南望姑孰如在足下江光雲影嗒然
忘歸峯頂高閣數層意欲登陟而苦于足疲遂
止同行諸子兩日來已數度上下矣返舟作四
韵紀遊江邊人影石欄齊夕照平臨小艇低青
接遠亭斜有徑黑窺深洞峭無梯虬枝霧結仙
樓迴鳥道雲穿大壑迷長揖前脩生逸興忘歸
偏在翠螺西二十日風順抵江寧時王師自粵

東還者猶半駐江干諸舟蟻聚隘不容泊向當
事者易舟北上迫不可得遂停石頭城側俗所
謂鬼面城也連日兀坐舟中成秦淮雜詩二十
絕春日秦淮水閒通旦暮潮輕風爲借力穩送
木蘭橈夢裏江南路金陵一棹新曉來風乍起
疑是故鄉春泊舟石城側坐對棲霞山聞有探
梅客山中自往還鍾阜臨江渚千年王氣悲蒼
蒼雲樹杳目斷蔣侯祠蕭瑟青溪月風流白下
塵唯餘江上水曾送六朝人連檣自粵來經歲

南行日言
江干住估帆慎莫停軍符捉汝去渡口歌桃葉
歡名憶莫愁芳踪俱寂寞烟景似深秋別樣天
孫錦競奢日不同誰知機杼女夜夜泣春風鸚
鵡怯春寒對人悄不語梅花影半踈共結扁舟
侶子夜新聲歇梨園法曲殘淒涼南北里遺恨
小長干城邊舟亂行城中人未起悠悠不相問
同飲建業水南朝五百寺強半碧峯間何處尋
都講名山相對閒王謝人空盡梁陳怨未消冶
城橋畔柳無復最長條城內鷄鳴山聲聲啼不
歇涼雨響孤舟臥見遙烟滅圖書荒舊宅松石
散名園指點江山蹟空餘故老存遠山青欲斷
苔影碧參差處處橋烏集天涯日暮時昔人埋
骨處霸圖逝烟冷秦淮諸女兒猶照清波影蹀
躑誰家子江頭自臂膺冶游知有地春草綠干
層朝雲水際浮流影抱天闕中有休糧僧坐擁
半巖雪獨愛江邊石微茫燕子斜烏衣非舊里
飛向阿誰家二十五日法黃石方伯杜子濂大
參召飲二君皆同鄉法又先進相對甚愜是夕

雨甚夜卽宿子濂齋中留贈二首醉餘分一榻
置我水雲間書幌侵蘭臭茶烟近鶴閒歸心江
浦樹雨色秣陵山入夜耽琴詠能清倦客顏十
載金門侶風流此建康離懷驚把袂鄉夢得連
牀竹暖迴春氣梅踈續夜香扁舟從海畔歌嘯
意難忘二十九日同杜子濂夜遊法黃石園亭
籓署乃徐定國舊邸疊山引沼頗有幽致佳石
林立桐竹扶踈惜秉燭之頃不及遠眺爲歎耳
因賦一律紀之吏隱先生迴不羣名園春色許

平分六朝石影呼同丈三徑篁聲愛是君地僻
岩陰寬積雪宵涼洞口養閒雲更須秉燭陪佳
賞江畔明朝別緒紛二月初二日始獲移舟河
畔柳枝已全作金縷迴憶出都時柳甫半凋荏
苒間遂爾半載偶成一絕石城楊柳已毵毵低
映清波色蔚藍不似梅花翻易落帶人風雨是
江南初五日法黃石方伯劉仁侯臬長杜子濂
大叅召看吉祥寺梅梅踈寺後枝橫半畝圍以
曲檻老幹蒼然相傳爲數百年物後爲拜梅菴

南行日記
四
黃石賦二律見投別後却寄一首梅陰深藉曲
欄遮寂寂琳宮閱歲華半落乍疑三尺雪冶遊
猶認六朝花同心載酒香分屐別思臨春月滿
槎歸去琅玕欣在握踈枝回首已天涯初七日
舟發江寧泊燕子磯畔江山如畫秀麗獨絕爲
賦一詩羣山忽盡碧江頭片石孤撐萬里流路
界荒烟斜到寺波涵夕照暗隨舟鳥聲乍接高
峯磬雲影遙侵絕浦鷗斟酌春光岩際好徑須
策杖一探幽初八日放舟入江西風甚厲頂刻

達青山口是夕宿儀真南郭成一律云春澹真
州郭輕帆薄暮停羣峰聯北固一水界南冷暖
入魚苗長烟深柳眼冥夕陽紛欲下回首大江
青初九日曉發儀真舟中一絕曉問晴光鳥語
知穠桃婀娜借風吹萋萋岸草青如許恰似湘
南十月時時已入內河碧流一線僅可容舫兩
岸烟柳如織桃杏間吐茆亭低屋曲隴平橋極
掩映之致念江濤震蕩中往復四閱月真堪夢
悸喜賦四韵輕颺吹客古揚州一棹乘春漾碧

流忽訝舟行平地上還看鳥散午溪頭菜花夾
岸兒尋蝶柳影當門嬾飯牛漸近雷塘芳草路
江湖回憶乍銷憂夕抵揚州初十日召暮雨作
入夜聞雷聲是日適春分矣十五日發揚州雨
甚行數里卽泊成一絕花朝寒雨廣陵城春水
迎潮細細生多少冶游湖畔去橋邊聞折柳條
聲十六日次邵伯驛道中有作隋苑淒涼事已
徂繞隄依舊長蘼蕪一帆暮雨揚州郭二月輕
風邵伯湖野塢烟深藏乳燕春塘水淺露晴鳧

小窳漫擬淮南賦招隱千秋尚可呼十七日風
利已刻達高郵平湖渺漫漁舟歷歷新柳映波
晴日半吐舟中微覺有寒意一絕紀事小艇荒
村共一洲漁歌聲裡接秦郵無端帆影落湖際
萬頃清波白鷺浮是夕過高郵三十里湖畔野
泊十八日達寶應道中有作如鏡夾長堤芊綿
岸草齊帆遙羣鳥逝水濶一輪低麥隴青崖際
漁家白浦西春光歸甍社日極晚烟迷十九日
午抵淮安泊舟處近淮陰侯釣臺賦三絕吊之



原件模糊

廢臺臨古堞夕日下淮陰太息王孫節千秋不
 易心漢中臺已荒垓下事空悵唯有漂母祠知
 已儼相向勇從勝下生禍自登壇始身後賢豪
 名長風吹綠水二十二日舟發達清江浦是夜
 大風雨二十三日風轉盛雨綿綿不絕二十四
 日早渡黃河宿王家營自是將登陸北向是日
 寒食賦一律寒食影蕭蕭長河春寂寥帆低涼
 帶雨海近午通潮草色連沙暗花光拂霧消年
 年歌瓠子民命等蓬飄二十五日清明曉風寒

甚衣裘坐輿中猶覺凜冽辰過清河縣既無城
 郭亦乏烟火亦屋數家時時為波臣所嚙而又
 罷於孔道蒸邑之民中成一律登車好
 輿踏青期淮北春寒未盡半歲烟波隨釣叟
 連宵風雨如花枝羊腸道河流轉蝸舍頻經
 決口移小邑道管入道尚天涯時

河水不平道流道和所見滾滾

春水淺痕初

河故鄉那

數日... 獲粒多
... 六日循
... 之民土
... 入同於鳥
... 鄉戀遷
... 是日凡數渡
... 可當
... 備及煇爲行
... 旅舍得

菲苑半間扉牖背闕大河湯湯去不數尋長途
蕭索此夕爲最二十七日早發一渡決口午抵
宿遷縣時諸邑令長皆奔走河干邑館闐然自
渡淮以來未嘗接一長吏飯過卽行北向岡巒
杳複紛埃撲人別一境界晚宿司吾驛行百二
十里矣二十八日曉行卽事一律朝曦晡靄上
荒林野燒微茫古道侵芳草時時通遠夢閒雲
處處識歸心三春雪影留吳舫臘月鴻聲憶楚
吟到眼風光看漸異鳥啼并入故鄉音午過紅

花埠驛爲山東界，杏徧野，譬散錦拖霞，柳影
幕天，菜花鋪地，行人如入衆香國中，凡二十里
不絕，但大風揚沙，不能不致損花光耳。夕抵鄉
城，縣城內敗礫頽垣，無一稅駕之舍，近城亦風
物蕭條，殊乏佳致。宿城北旅舍，返不及一村，落
二十九日午渡沂水，晚達沂州，入館舍，如頽敗
僧院，四壁塵飛，但馬糞踰尺，差不似耳。偶作一
律，細草琅琊道，歸雲晚渡河，酒紅鄉味重，山碧
夕陽多。鳩語隣荒井，鴉巢戀舊柯，吾廬春色徧。

綠可到藤蘿，三月一日早發，再渡沂水，折而東
北向道中，一絕郭邑，村光濃淡，遮清沂，幾箇界
平沙草深，徑僻鶯聲絕，風動棠梨樹，花是夕
宿下莊村舍，爲吾郡莒州境，亂荒嶺數
重嶺際草始微，綠憶長淮南北已，靡蕪滿眼無
論江南然洞庭，南畔草色又經冬，不改遂別具
一天地，予發長沙時已逾冬至，雖薄經霜雪而
萋萋不衰，唯木葉間脫，蕉葉微黃而已。未審葱
嶺西榆塞北，此時草色又復何似，予往返數千

里所見已不同若此因紀以志慨二日已別
莒州家僮輩有迎道左者偶書一首鄉園漸近
轉春寒別緒關心擬萬端恰是逢人渾忘却
匆剛解訊平安過莒州而北平疇麥隴村舍相
比繁花滿樹和風襲人較州南境爲勝夕宿趙
店初三日鷄甫唱卽起戎裝旣而雨作留晨遂
冒雨發十里後雨止途中卽事雨色冒陸
嶺光明滅夜來曾宿處澹澹村烟發布穀語
熟喚晴鳩乍歇掩雷櫻桃花野岸飄芳雪微
忽蕩橘泠泠幽澗折行役踏遠春屢負芳菲節
園林睠新霽延竚青薇蕨襖襖難及期目極翻
內熱是日漸晴日未入抵諸城縣行百有四十
里成二絕句海風臺畔瑯琊月夕照城邊馬耳
山二十七年前過地啄人鳥雀自飛還舊路依
稀惡夢醒當年流血草間腥黃昏古堞孤村月
尙帶燐燐鬼火青蓋紀實也初四日抵安丘此
後別爲記

國子監藏書



卷之二